

# 恁ê歌聲 我真感動

■ 姚志龍 | 台文工作者 ■

九二一地震了後，阮教會主動用實際行動關心南投縣山地受災ê教會，除了奉獻金錢、收集物資以外，koh包遊覽車去一間山地教會，kap in做夥禮拜，了解 inê欠缺、安慰 in驚惶ê心靈，山地駐堂ê牧師tī講道中講這句話：「恁ê聖歌隊tī禮拜前ê練習，hō我真感動，ná親像天使ê歌聲」。原住民ê歌聲koh-khah好聽是人人知--ê，牧師是teh講好聽話，iah是 inê部落已經真久無用合唱ê方式teh o-ló上帝。三禮拜前就是tī六月初，高雄協談中心派工作人員來阮教會募款，講道ê姊妹，sio-siāng按呢講：「我雖然是基督徒，lóng有去禮拜soah真久無聽著chiah suiê台語四部合唱，聽著歌聲，我ê目屎kiōng-beh流--落--來。」

2008年六月第三禮拜ê拜六，聖歌隊tāk禮拜經常ê練唱中，張指揮忽然soah停--落--來；前幾工，我走幾間冊店kap樂器行chhōe咱聖歌隊beh用ê新歌、新譜，結果，頭家lóngkā我講，阮mā已經真久無koh看著新ê創作--a！無啥市場，作曲家mākhah有歲--a，身體bē堪--得--a，總講是，市場ê問題；按呢咱以後beh唱好聽ê新歌就khah困難，合唱曲真少人teh寫作，尤其是台語四部合唱ê讚美歌，koh-khah少人用，咱愛好好仔保惜以前ê譜，kā

好聽ê讚美歌提出來練hōkhah熟--leh！

有時，家已靜靜teh思考，啥物款方式ê主日禮拜、啥款ê讚美歌（北京語、台語、敬拜讚美），chiah是主所歡喜--ê、主所愛--ê？目前長老教會tī主日禮拜ê方式，加減有teh改變，會使按呢講，kap早期、kap40冬前長老教會ê禮拜方式已經有真大ê差異。對頂面所描述，這幾年來禮拜方式ê演變，阮chit間小小ê教會，是kan-na用真心獻上詩歌o-ló主、o-ló上帝ê聖歌隊，阮ê歌聲mā普通普通nā-tiā<sup>n</sup>，soah對頭一擺聽著聖歌隊歌聲ê牧師、傳道、姊妹，就使in真感動，chitê代誌使我心內產生淡薄仔ê憂傷，kám是現代人已經無耐性、無時間koh tīhia teh分部練唱？Kám是四部合唱已經tòebē著時代、已經bē流行？其實，tī咱主日崇拜時常teh用ê聖詩有500外首，tāk首lóngmā是四部ê合唱譜，咱大家若甘願放棄合唱，選擇其他ê方式o-ló上帝，he是咱ê選擇；總--是tī聖樂創作chit部分，kámoan-na同時teh衰微，kám真正已經無少年ê作曲家、已經無人繼續寫作ê傳承，繼續寫出o-ló上帝、會安慰--人、會感動--人ê詩歌？

# 我是阮 tau ê 聯絡部

► 藍天中 ê 飛魚 | 教會青年

Tī 我高中 toà 外面宿舍 ê 時，厝內 ê 媽媽 kap 阿媽時常會 khà 電話 hō-- 我，關心我食飯 -- 無、身體健康 -- 無、有啥物心事 -- 無？Hit-ê 時陣，若是我有歡喜 ê 代誌，我就會 ná 講 ná 笑，hō in 知影趣味 ê 代誌。若是我心肝真艱苦，我就會 ná 講 ná 流目屎，hō in 知影我 ê 煩惱。

Hit-ê 時陣，媽媽是阮 tau ê 聯絡部。

Tī 我讀大學 ê 時，我 tī 宿舍有牽一支電話，我時常用 chit 支電話 khà hō 媽媽、toà 外面 ê 妹妹 kap 朋友。有時無閒--起-來，就一段時間無 kap 厝內人聯絡。Tī 一遍 ê 機會，爸爸 kā 我講，妮妮，你若是會當，就 kap 你兩個妹妹聯絡，kap 你 ê 朋友聯絡，hō lín ê 感情 ná 來 ná 好。

Tui hit 時開始，我就變做阮 tau ê 聯絡部。

無論我去讀神學院、結婚成立家庭、去教會牧會，我 lóng kā 家已設立一個聯絡部 ê 關心時間：至少一禮拜 khà 一通電話 hō 兩 pêng（家已 kap 先生）ê 爸爸媽媽、我 ê 兩個妹妹，一個月 khà 一通電話 hō 阿公阿媽。

上帝 hō 我做聯絡部，我就將爸爸媽媽 ê 健康、生活情形 kap 需要代禱 ê 代誌轉達 hō 妹妹知影，mā thang 將妹妹歹勢講出嘴 ê 代誌 kap 需要代禱 ê 代誌轉達 hō 爸爸媽媽瞭解。有時陣我會主動問 in ê 需要 kap 代禱 ê 代誌，tī 電話中就 choā in 做夥祈禱。Tī 電話 beh 結束 ê 時，有時阮 mā 會向對方講「我愛你」、「多謝你」。

雖然有時陣我 mā 真希望爸爸媽媽 kap 妹妹 in 會當直接講話，按呢會 koh-khah 瞭解對方 ê 生活。總 -- 是有時陣爸爸媽媽 iah 是妹妹需要吐氣 ê 心事無一定 beh hō 厝內其他 ê 人知影，只是需要有人聽、有人代禱，我 chit-ê 聯絡部，就成做 in thang 吐氣 ê 窗仔。

按呢算 -- 起 - 來，我已經做聯絡部十一年 --a。Tī chit 十一年，除了 ài 繳電話錢是消磨以外，阮 ê 感情繼續連結、繼續發展，信仰增長、彼此陪伴 ê 時間是超過電話錢 ê 開銷。

Kiám-chhái 有人會感覺 khà 電話開講真傷重，若是 phah-lā-liàng、講閒仔話，我就感覺真無 chhái。若是關心厝內人、聽 in 講內心 ê 事、需要代禱 ê 代誌、會當幫忙 ê 代誌，我感覺家庭 ê 延續 kap 發展是一件真好 ê 投資。

Chit-má ê 時代真發展，有 MSN、SKYPE、MESSENGER、網路 ê 日記 (Blog)、我 ê 家族，會當用文字寫 tī 網路 kap 厝內人分享心內事，iah 是用網路電話 kap 厝內人、朋友講話，這 lóng 是一種聯絡 ê 方式。總 -- 是真重要 --ê 是，chia-ê 方式是 beh hō 咱 kap 人建立關係，做夥領受上帝 ê 疼、做夥為著咱 ê 家庭、工作、社會、世界 phah 拚，hō 咱彼此 koh-khah 和好。

若是恁兜 iáu 無聯絡部，我想你 thang 自動做聯絡 ê 人，關心厝內每一個人、hō 彼此感情 koh-khah 好、關係 koh-khah 密切。願上帝幫助 --咱，hō 咱為著家庭 ê 幸福盡一份心，好好使用上帝 hō 咱 ê 器具、科技，hō 咱 ê 家庭榮神益人。